

公開組季軍得獎作品

季軍：李應祥

題目：與聖賢對話

夫聖也者，睿通天地乾坤以造乎極，曰其仁之至也，故充養有道，和粹之氣，盎於面背，儼若泰山，邴邴乎雅達而神采、邈然高遠；夫賢也者，昭昭善行，研經典以守常，繼往聖絕學以顯教化，訂錙梓以傳遠。故老聃，釋尊、孔孟、濂溪橫渠，陽明二程等皆可謂聖賢。

然而浩浩法界，於穆無涯，聖人雖體徹大道，但各自開張，則承稟其立言者僅為戶牖。今撰此文，非欲針對某一人，欲就諸聖古賢所說，略抒鄙見而已。

曾讀張子橫渠之「正蒙」，其謂學釋迦之說便為聖人，卻謂其行則小人。以一大藏教，歷十信十住諸行，方入妙覺，信解修證為學，利濟群生為渡，焉可以小人之說述之？至於禪者，其徹悟非凡非聖，非佛非魔，非得非不得，非了非不了，如羚羊掛角，無修整次第，豈可言佛教人為聖？鳳不知美，鷓不知惡，陶唐氏不知聖，有苗氏不知暴，而各不礙其自正性命。使陶唐氏恃其聖，則非聖矣！所謂「水至清而結冰不清，神至明而結形不明」，諸佛先聖皆能相忘臻冥，參寥安寂，而發用時則沖漠無朕，智行圓揮，故後人方稱其聖耳。橫渠於其「太易篇」亦謂不言有無，情偽至隱蹟而不可惡，何以詆釋迦哉！

程子明道圓悟天下本不二，不需言合，幾於道矣。然其謂佛說妄說幻，既無好底性，何以言修？何以生死恐動人？故言聖賢以生死為本分事，無可懼故不論生死。實則明心見性，以區區之心，猶鏡之垢塵，鑛未成金，喫詬索之，而玄珠遂亡，疑情去盡，則勝解還生。又聖賢豈不知原始反終，明死生之說？禪者心跡，又豈有異於莊周之方內方外？聖人以此洗心，退藏於密，愧乎忘其言，不知說生，不知惡死，不忘其所始，不求其所終。世事如何沴亂，皆如雁過長空而不留跡，魚躍於淵而不留痕，故雖說妄說幻，於其本性豈曾動搖？礪松所以能凌霜，藏正氣也；美玉所以能犯火，蓄至精也。佛所言性，即此藏蓄之意而已，豈得言無好底性哉！

聖賢蹈空靈而不落塵濁，圓融而不執滯，恢宏而不局促，高曠而不卑謹，盈神韻而不兀傲，意飄逸而不奇崛，深邃卻有理緻。因此區區短文，添且本人樗櫟庸材，既不足與諸聖賢暢論對論，亦難暢其本懷於萬一，然而聖賢溥博淵泉而時出之，眾生藉此成性存存，不需末學再多饒舌矣。